

հետեւեալ ձեռով էր նկարագրում իր առաջին տպաւորութիւնները Հայաստանի մայրաքաղաքից.

«Երբ մտնում էի Երևանի ակումբը, տեսայ, որ իմ բոլոր ծանօթները Բագուից, Թիֆլիսից, Ռուսաստանից, բոլորը այնտեղ էին: Տէր Ասուած, ո՞վ չկար այնտեղ... Կազմւել էր մի հասարակութիւն, որի անդամները հէնց նոր եկած, իրար գլխի թափւած՝ ուզում էին ստեղծել նոր մայրաքաղաքի բնակչութիւն, նոր պետութեան քաղաքացիութիւն:

Երազ է թւում այս բոլորը:

Բայց սա իրականութիւն է: Հայաստանը կայ և պիտի լինի:

Երևան եկողը առաջին անգամ մի բան կը նկատէ, որ ոչ ոք պարսպ չէ: Ամէն մարդ բանի է, ամէն ոք շտապում է հոգածու հապճեպով: Զգիտեմ, Հայաստանի աւերմունքն է շատ և հայ ժողովուրդը ջանում է վերաշինել, թէ՞ հարկւրաւոր տարիների խանդարիչ հանգամանքները վերանալուց յետոյ հայր մի հանգիստ սրտով եկել է իր ազատ տունը և իրեն տւել է մի մոլութեան, որ յատուկ է հային. շինել, վերաշինել հէնց միայն, կարծես, շինելու համար...

Ամբողջ ճամբան, որով եկայ Հայաստան և անցայ նրա մայրաքաղաքը, աւերի հետքեր էին և շինող ձեռքի արդիւնքներ: Երևանի փողոցներում տեսնում ես այդ աշխատաւոր ժողովուրդին: Արևառ, խտաղէմ, տրեխաւոր, կարկատնած, մտահոգ. դա հայ գիւղացին է — դործի է դնում... Այժմ հայ գիւղացին հաց և պաշար ունի՝ արիւն-քրտնքի գնով ձեռք բերած»։*)

Անկախութիւնը խօսք չէր այլևս, այլ իրական փաստ, որ վաւերացւեց և միջադէպին իրաւական ճանաչումով: Օգոստ. 10-ին ստորագրեց Սևրի դաշնագիրը: Հայաստանը դաշնագիր կողմ էր: Ստեղծւում էր Միացեալ Հայաստան: Հայի նւիրական երազը իրականութիւն էր դառնում:

Ա. Ահարոնեանը հետեւեալ ձեռով էր նկարագրում «պատմական անցքի նկարագիրը», կառավարութեան ուղարկած գեկուցման մէջ**).

«Ճաշից յետոյ, ժամը 4-ին, երկու օթոմոբիլներով Փարիզից հասանք Սևր: Ինձ ուղեկցում էին խորհրդականներ Ա. Խնֆիաջեանը, բժ. Յ. Նէվրուզը և 2 քարտուղարներ: Սևրի յախճապակու յայտնի գեղարւեստական դործարանի գլխաւոր դահլիճը պատրաստւած էր Խաղաղութեան Համաժողովն ընդունելու համար: Այդ դահլիճի ճակատի պատի տակ տեղ բռնեցին մեծ պետութեանց պատւիրակները. աջ ու ձախ պատերի տակ երկու թեւերով՝ փոքր դաշնակիցների տեղն էր: Հայաստանը իր տեղն ունէր ձախ թեւում, ռումէնների և չեխոսլովակների կողքին, ուր և ես տեղ բռնեցի, մինչդեռ մեր խորհրդականներն ու քարտուղարները տեղաւորւեցին պատւիրակների թիկնաթոռների յետեւում, յատուկ պատրաստւած աթոռների վրա: Իմ առջև, սեղանի վրա, դրւած էր փոքրիկ քարտ, որի վրա գրւած էր Plénipotentiaire d'Arménie.

Ժամը 4-ից անց էր, երբ գրեթէ նստած էին բոլոր պետութիւնների ներկայացուցիչները, ներս մտաւ Համաժողովի նախագահ պ. Ա. Միլլըրան: Բացակայում էին միայն թիւրք պատւիրակները, որոնք սպասում էին վարի

*) «Աշխատաւոր», 22 հոկտ. 1920.

**) Հ. Հ. Պատւիրակութեան «Գործ» № 101, Ահարոնեանի 19 օգ. նամակը Հայաստանի արտ. գործոց նախարարին: